

**Meeqqat arsaarinnissutaasut angajoqqaarsiaanni atugarisat nakkutigineqartarnissaat
ersarinneruleqqullugu tassungalu ilanngullugu meeqqat arsaarinnissutaasut pillugit
iliuusissanut pilersaarusiortoqartalernissaata qulakkeerneqarnissaa anguniarlugu
siunnersuuteqaqqullugit Naalakkersuisut peqquneqarnissaannik Inatsisartut
aalajangiiffigisassaattut siunnersuut**

(Inatsisartunut ilaasortaq Astrid Fleischer Rex, Demokraatit)

pillugu

Ilaqutariinnermut Peqqissutsimullu Ataatsimiititaliap

ISUMALIUTISSIISSUMMUT

Aalajangiiffigisassatut siunnersuutip aappassaaneerneqarnerani saqqummiunneqartoq

Ilaqutariinnermut Peqqissutsimullu ataatsimiititaliaq suliaqarnermini kingullermi ukuninnga inuttaqarpoq:

Inatsisartunut ilaasortaq Olga P. Berthelsen, Inuit Ataqtigiit
Inatsisartunut ilaasortaq Debora Kleist, Inuit Ataqtigiit
Inatsisartunut ilaasortaq Isak Hammond, Inuit Ataqtigiit
Inatsisartunut ilaasortaq Astrid Fleischer Rex, Demokraatit
Inatsisartunut ilaasortaq Knud Kristiansen, Atassut
Inatsisartunut ilaasortaq Ruth Heilmann, Siumut
Inatsisartunut ilaasortaq Malik Berthelsen, Siumut

Ulloq 18. oktober 2011 UKA 2011-ip ingerlanerani siunnersuut siullermeerneqareerluni Ilaqutariinnermut Peqqissutsimullu Ataatsimiititaliami sukumiinerusumik suliarineqartussanngorlugu innersuussutigineqarpoq.

Siunnersuutip imarisaa siunertaalu

Aalajangiiffigisassatut siunnersuutip uuma siunertaraa meeqqat inuusuttullu angerlarsimaffiup avataanut inissinneqarsimasut nakkutigineqarnissaasa kiisalu meeqqanut inuusuttunullu angerlarsimaffiup avataanut inissinneqarsimasunut tunngatillugu iliuusissatut pilersaarutit suliarineqarnissaasa qulakkeerneqarnissaat.

1. Siunnersuutip Inatsisartuni siullermeerneqarnera

Siunnersuutip siullermeerneqarnerani siunnersuut ilusimisut iluseqartillugu isumaqataaffigineqanngilaq.

Naalakkersuisut, Inuit Ataqatigiit, Demokraatit aamma Kattusseqatigiit Partiiat siunnersuummut tapersersuipput, Siumulli aamma Atassutip siunnersuut akuerisassatut innersuussinnaanagu.

Tamanna tunngavigalugu siullermeerinninnermilu oqallinneq eqqarsaatigalugu, siunnersuutip suliarineqarnerata ingerlateqqinneqarnera Ilaqutariinnermut Peqqissutsimullu Ataatsimiititaliamit aallartinneqarpoq.

Ataatsimiititaliap siunnersuummik suliarinninnera

Siunnersuutip sammissaa ataatsimiititaliap annertuumik pingaarutilittut nalilerpaa. Angajoqqaarsianut tunngatillugu siunnersuutit arlallit ukiuni kingullerni suliarineqartarsimapput, kisiannili meeqqat inuusuttullu angajoqqaarsianut inissinneqarsimasut immikkut ittumik nakkutigineqarnissaat pillugu siunnersuuteqartoqarsimanani.

Meeqqat inuusuttullu angerlarsimaffiup avataanut inissinneqarsimasut aamma ilaqutariinnut inissinneqarsimasut pillugit suliniutit nukittorsarneqarnissaat ataatsimiititaliap tapersersorpaa.

Angerlarsimaffiup avataanut inissiinerit pitsaanerulernissaat qulakkeerniarlugu suliniutit ataatsimiititaliap tapersersorpai.

Meeraq angerlarsimaffiup avataanut inissinneqartussanngoraangat inissiinerup siunertaanik piviusunngortitsinissamut inissiivissaq tulluarnepaaq kommunep toqqartussaavaa, soorlutaaq inisseeriaatsip toqqarneqartup iluani inissiivissaq tigussaasoq kommunip toqqartussaagaa. Inissiinermi sumiiffissamik naleqquttumik inaarutaasumik toqqaanermi inissiiviup meeqqap imaluunniit inuusuttup atugarissaarnissaanut ineriartornissaanullu kiisalu meeqqap inuusuttulluunniit ilaqtaminut attaveqarneranut pitsaanerpaamik atugassaqartitsinissaa qulakkeerneqassaaq. Angajoqqaarsiat tassunga atatillugu annertuumik pingaarutilimmik tatigeqatigiiffiusumillu kommunini oqartussanut matumani suleqataapput.

Inissiinermi pisut iluatsissappata akissuteqaammi allassimasoq naapertorlugu inissiinerup siulliup iluatsilluartumik pinissaa, tassungalu ilanngullugu angajoqqaarsiat inissinneqartup pisariaqartitaanut naleqquttuunersut inissiinerullu siunertaanut piumasaqaataasunut naammassinnissinnaanersut aalajangiisuussaaq. Aammattaaq meeqqap inissinneqartup angajoqqaarsiassaminut tulluartuunissaa pingartinneqarpoq.

Meeqqanik inuusuttunillu ikiorsiisarneq pillugu Inatsisartut peqqussutaanni atuuttumi angerlarsimaffiup avataanut inissiinermi kommunip qanoq suleriuseqarnissaa pillugu ersarissumik malittarisassaqqarpoq. Aammattaaq kommunip akunniliuffigisaanik meeraq angerlarsimaffiup avataanut inissinneqartillugu immikkut ittumik iliuusissatut pilersaarusiortoqarnissaa inatsimmi tassani aamma ersarissumik aalajangersarneqqarpoq. Aammattaaq inatsimmi aalajangersagaqqarpoq angajoqqaarsiat pillugit nalimmassaasussamik, tassunga ilanngullugu kommunip akuersisarneranut tunngasut.

Meeqqat angerlarsimaffiup avataanut inissinneqarsimasut kommunit aqutigalugit nakkutigineqarnerinut nalimmassaanerup nukittorsaavigineqarnissaa pisariaqartoq ataatsimiititaliaq tamarmiuserup isumaqqarpoq.

Angajoqqaarsianik nalinnaasumik nakkutilliinissap aammalu inummut tunngasutigut kiisalu meeqqat inuusuttullu ataasiakkaat angajoqqaarsianut inissinneqarsimasut nakkutigilluarneqarnerunissaannut kommunit pisussaaffeqarnerat erseqqissarneqassaaq. Inummut tunngasutigut nakkutilliisarnissap minnerpaamik ukiumut ataasiarluni pisarnissaa pingaaruteqartutut isigineqqarpoq, inissiiviusumi kommunip meeraq oqaloqatigisarlugu. Ukiumut arlaleriarluni nakkutillisarnissaq inissinneqartup inissinneqarnermi ingerlanera pissarsiffigisimaneraa qularnanngitsumik malinnaaviginninnermut iluaqutaassaaq, aammalu qularnaassallungu inissiinerup taamaatinnaannut tunngavissaqqarnerisooq. Angajoqqaarsianut ornigulluni takusaasarnerup saniatigut angajoqqaarsiat, meeqqat inissinneqartut kommunillu (tigussaasumik nakkutilliinerup) akornanni ataavartumik attaveqartarneq oqaloqatigiittarnerillu assut pingaaruteqarput.

Kalaallit Nunaanni kommunini ataasiakkaani najungaqariaaseq tunngavigalugu attaveqartarneq arlalitsigut oqarasuaatikkut imaluunniit attaveqaatit nutaaliaasut atorlugit pisarsinnaasarpoq.

Kommunit nakkutilliinermik suliaasa ingerlaneranni ataavartumillu attaveqatigiinnermi aammattaaq siumoortumik nalunaaruteqaqqaarani takusaanermi angajoqqaarsiat peqataatinnagit inissinneqarsimasut oqaloqatigineqartarnissaat ataatsimiititaliamit pingaartutut isigineqqarpoq, taamaalilluni inissinneqarsimasup isaaniit isigalugu atugarisat nalilerneqarnissaat qulakkeerneqassamat.

Pinaveersaartitsineq suliniutillu pillugit

Meeqqat inuusuttullu angerlarsimaffiup avataanut inissinneqarsimasut pillugit inuiaqatigiit suliassaata annertuup angajoqqaarsianit kivinneqarneranut qujaniarluni ataqqinnillunilu pinaveersaartitsinermik suliniutit nunatsinni ilaqutariinnik nukittorsaanikkut nammineq meeqqamut pilersuinissamat isumaginnittussaanermullu akisussaaffiup angajoqqaani

ilaquttanilu aalajangiusimaneqarnissaat Ilaqutariinnermut Peqqissutsimullu Ataatsimiititaliap tapersersorpaa.

Ilaqutariinnermut Peqqissutsimullu Ataatsimiititaliap kissaatigaa pinaveersaartitsinermik suliniutit ima qaffasitsigisumik pitsaatigissasut, ataatsimut isigalugu angerlarsimaffiup avataanut inissiisariaqalernerit ullumikkutuut amerlatigiunnaassallutik. Tamanna imatut paasillugu meeqqanik inuusuttunillu sumiginnaanerup kingunerisaanik inissiisariaqartarnernik aallaaveqartartut.

Iliuusissatut pilersaarutitut siunnersuutip imarisaanut tunngatillugu ataatsimiititaliap erseqqissaatigissavaa meeqqamut inissinneqartussamat iliuusissatut pilersaarusiornissaq inatsisitigut piumasaqaataammat. Oqartussaasutut tamatumuuna aamma inatsiseqartitsinerup maleruarneqarnissaa Naalakkersuisut qulakkiigassaraat.

Immikkoortut ilaannut tunngatillugu inatsisiliorneq piareeraluartoq isumaliutigineqarsinnaavoq iliuusissatut pilersaarusiornissaq qulakkeerniarlugu inatsimmik nalimmassaanermi aalajangersagaliortoqarnissaa ilanngunneqarsinnaanersoq eqqarsaasersuutigissallugu, tassalu iliuusissatut pilersaarutit naalakkersuisoqarfimmut pineqartumut Naalakkersuisut ataanni ilisimatitsissutitut nassiunneqarsinnaasut kommunit inatsisitigut ilisimatitsinissaminut pisussaaffeqarnerat naapertorlugu tassalu meeqqap angerlarsimaffiup avataanut inissinneqarnissaanik kommunip aalajangiinera.

Meeqqat inissinneqarsimasut pillugit kisitsisitigut paasissutissat sukaterivigineqarlutillu ersarinnerulersinneqassasut Ilaqutariinnermut Peqqissutsimullu Ataatsimiititaliap **innersuussutigaa.**

Pinaveersaartitsinermik suliniutit siunertaq malillugu sunniuteqarsimanersut aammalu pinaveersaartitsinermik suliaqarneq naammanginarnersoq ataavartumik uuttortarneqartarnissaa nalilersorneqarlunilu erseqqisarneqartarnissaa Ilaqutariinnermut Peqqissutsimullu Ataatsimiititaliap **innersuussutigaa.**

Immikkoortup nukittorsaaviginissaanut nalimmassaaviginissaanullu siunnersuutissat kommunit angajoqqaarsianullu sinniisuutitat akornanni qanimut suleqatigiilluni ingerlanneqartassapput.

Angajoqqaarsiat tungaasigut misissuinissap pilersaarutigineqartup saqqummiunneqarnissaa Ilaqutariinnermut Peqqissutsimullu Ataatsimiititaliap qilanaaraa.

Siunnersuutip aningaasatigut kingunerisinnaasai

Meeqqanik inuusuttunillu inissiisarnerup nukittorsaaviginissaa, tassunga ilanngullugu

immikkoortunik aaqqissuussinissaq aammalu nakkutilliisarnerup annertusinissaa qularnanngitsumik kommuninut aningaasartuutunik nassataqassaaq. Aningaasatigut pisussaaffiliinerit immikkoortumut aningaasaliussaareersunut tunngatillugu qanoq ikkumaarneri erseqqinnerusumik nalunaarusiornikkut pissapput. Pinaveersaartitsinermik suliniutit iliutsillu ungasinnerusoq isigalugu sumiginnaasarnerup annikillineratigut inuiaqatigiinnut tamanna annertuumik iluaqutaassaaq.

Ataatsimiititaliap innersuussutai

Ataatsimiititaliami amerlanerussuteqartut Inuit Ataqtigiinneersut aamma Demokraatineersut siunnersuut pillugu ima oqaaseqarput:

Meeqqat inuusuttullu inissinneqarsimasut sumiiffiisa nakkutigineqarnerannut tunngatillugu piunasaqaatit qaffasinnerunissaat ersarinnerunissaallu pisariaqartinneqartoq amerlanerussuteqartut isumaqarput. Maleruagassat ersarissut atorneqanngippata nakkutilliinerup ingerlanniarnera ajornakusuussaaq. Amerlanerussuteqartut isumaqarput nakkutilliinermik suliaassaq ersarinnerusumik kommuninut nassuiaatigineqartariaqartoq, matumani pingaartumik pitsaassutsimut annertussutsimullu tunngatillugu. Imminut piunaffigeqatigiinnikkut inissiinerit pitsaassusaat tamanut iluaqutaasumik qulakkeerneqarsinnaapput, tassungalu peqatigitillugu meeqqanut inuusuttunullu inissinneqarsimasunut sinaakkutassat toqqissisimanartut qulakkeerneqassallutik. Nakkutilliinerup pitsaassusaata qaffanneqarneratigut angajoqqaarsiat meeqqat inissinneqarsimasut pillugit kommuninut qaninnerusumik attaveqateqarnissaminnut periarfissaqalissapput, tamannalu pineqartunut tamanut iluaqutaassaaq. Meeqqanut inissinneqarsimasunut iliussissatut pilersaarutit suliarineqarnissaasa qulakkeerneqarnissaannut suliniutissaat amerlanerussuteqartunit aamma qilanaarineqarput.

Ataatsimiititaliami amerlanerussuteqartut qulaani taaneqartut tamanna tunngavigalugu siunnersuut akuerineqartussatut innersuussutigaat.

Ataatsimiititaliami ikinnerussuteqartut Siumumeersut aamma Atassummeersut siunnersuut pillugu ima oqaaseqarput:

Ikinnerussuteqartut siornatigulli meeqqat inuusuttullu inissinneqarsimasut atugarisaasa nakkutigineqarnerannut nukittorsaanissamik siunertalinnik siunnersuutaasimasunik tapersersuisarsimapput. Inatsisartut tamarmiusut isumaqatigiillutik siunnersuut 2010/52 kingullermik aalajangiuppaat. Aalajangiiffigisassatut siunnersuutit aalajangiunneqartut Naalakkersuisunit malitseqartinneqartarnissaat annertuumik pingaaruteqarpoq. Taamaalillutik ikinnerussuteqartut meeqqanut inuusuttunullu angerlarsimaffiup avataanut inissinneqarsimasunut suliniutinik nukittorsaaasunik akuersissuteqareernertik erseqqissassallugu pingaartippaat. Suliniutissanut pilersaarusiornermi inatsisit assut ersarittut

ikinnerussuteqartut isumaqarput. Meeqqat inissinneqarsimasut pillugit suliniutissanut pilersaarusiornissaq inatsisitigut piumasaqaataavoq. Naalakkersuisut pisussaataapput kommunit inatsisinik eqquutsitsinissaat qulakkiissallugu. Inatsisartut inassutigeriigaattut nakkutilliinerup ersarissarneqarnissaa nukittorsarneqarnissaalu pillugit UPA 2012-imi Naalakkersuisut siunnersuummik tigussaasumik nassiussaqaarnissaat ikinnerussuteqartunit qilanaarinearpoq. Pingaarutilik tassaavoq siunnersuutip saqqummiunneqannginnermini kommuninut angajoqqaarsiallu sinniissaannut tusarniaatigineqareersimanissaa, taamaaliornikkut taakku isumaat inatsisiliormik suliami piimaartussami ilanngunneqarniassammata.

Ataatsimiititaliami ikinnerussuteqartut qulaani taaneqartut tamanna tunngavigalugu siunnersuut itigartinneqartussatut innersuussutigaat.

Taamatut oqaaseqarluni isumaliutissiisummilu allassimasunut paasinnilluni ataatsimiititaliap siunnersuut aappasaaniingassanngortippaa.

Olga P. Berthelsen,
Siulittaasoq

Debora Kleist

Isak Hammond

Astrid Fleischer Rex

Knud Kristiansen

Ruth Heilmann

Malik Berthelsen